

# كلمة الرئيس محمد أنور السادات في لقائه بقيادات العمال والفلاحين الزراعيين

في ١٨ أغسطس ١٩٧٩

بسم الله

إخوتي وأخواني ... أبنائي وبناتي

حقيقة ما استمعنا اليه اليوم ، نقاش من امتع ما سمعت وارىد شعبنا كله أن يسمعه ،  
المتحدثين .. لما اخونا وزير العمل عن العمال ، ونقيب الزراعيين .. .. نقيب  
الفلاحين .. ورجل التعاون بتاع الاصلاح الزراعي .. وبنتنا اللي تحدثت ايضا عن  
دور المرأة في الريف ، لأول مرة بيحدث هذا علي مستوي مصر ، وهذا هو ما  
أردت فعلا أنه في هذه المرحلة بالذات ، ونحن نستعد لبناء مصر ، يجب ان يكون  
مفهوم إن بناء مصر لا يخص الحكومة وحدها أو مجلس الشعب وحده ، أو أي سلطات  
أخري وحدها ، وانما هويهم كل مصري ومصرية ، كل من يعيش علي أرض مصر  
، واعتقد انه لأول مرة يجتمع هذا الجمع في مثل هذا اللقاء اللي بيتلقى فيه العمال  
والفلاحين والزراعيين والتعاونيين ، وده الهدف علي ان يكون بناء مصر بايدينا  
جميعا ، اللي استمعنا اليه أوكد لكم . انا في موقعي منذ تسع سنوات ولكن كثير جدا  
فيما سمعته اليوم باسمعه لأول مرة .. وبيشكل فعلا حقيقة ما يعيشها المجتمع سواء  
في مختلف التخصصات اللي سمعناها أو مشاكلنا الكبرى كمصريين كلنا جميعا لان  
نكون معنيين بيها سواء في المشاكل العاجلة او الصعبة اللي احنا بنواجهها زي الطعام  
والاسكان أو الحلول الممكنة لبناء مصر علشان يتمتع كل مصري ومصرية بمستوي  
حياة لائق وشريف وكما سمعتموني ، أقول لكم ، ان علي أرض مصر مكان  
وثروات لكل واحد .. لكل مواطن ومواطنة من ال ٤١ مليون علشان يعيش حياة  
كريمة ويبني لنفسه وللاجيال من بعده ويؤدي لبلده علشان الشعب كله بنظام الاسرة

الواحدة اللي أنا متمسك به دائما يتكافل كل أعضائه مع بعض . اجمل مافي هذا الاجتماع ايضا ، هوانه بنجلس علشان نحكي عن متاعبنا ومشاكلنا في مصر ، وليس هناك قيد علينا اطلاقا .. البلد ملكنا ، الارض ارضنا .. القرار قرارنا .. المشاكل مشاكلنا احنا ، ولن تحل هذه المشاكل أبدا كما سمعتموني قبل كده باتكلم .. لن تحل لا بالحكومة وحدها ، ولا بأجهزة الدولة وحدها ، اللي يحل هذه المشاكل هو الانسان المصري .. رجل كان أو امرأة .. كل في مكانه . اليوم شعبنا حيستمع الي ما استمعنا اليه كلنا سواء ، وكما قلت لكم كثير مما سمعته أسمعته لأول مرة ، وبيقال بصدق ، وبيقال باخلاص لانه الهدف هو اننا فعلا نعرف أساس المشكلة ايه يوم ما نعلم أساس المشكلة الحل سهل بعد ذلك مادمننا شخصنا المشكلة

وده كانت عملية تنقصنا دائما لانه كان فيه دائما انفصال ما بين الحاكم والمحكوم .. اليوم لأ بنعود شعب واحد واسرة واحدة ، وبنضع مشاكلنا بمنتهي الصدق والاخلاص ، وزى ما قلت لكم وضع المشاكل هو أول الطريق السليم للحل ، اليوم بيتضح مما سمعناه حقيقة أنا بانادي بيها من زمن .. اقتصاد مصر أساسه كان الزراعة ، وسيظل الزراعة لفترة طويلة جدا مقبلة لعلمكم بتسمعوا عن الانتاج في الدول اللي بنت مستوى معيشة كريم لابنائها .. دولة صغيرة زي الدانمارك ٥ مليون بتاكل العالم كله البان ، وجبنه ، ومنتجات زراعية ٥ مليون وفي رقعة أومساحة لا تذكر جنب المساحات اللي عندنا هنا .. أبدا .. بل عندهم في الجوبتايم كما تعلموا فصول التلج بيغطي كل شئ ، احنا عندنا بحمد الله الاربع فصول ، وعندنا الارض ، والفلاح والميه ، والجو، كل شئ .. دولة صغيرة ٥ مليون بتأكل العالم كله بيض . وفراخ وجبن ومنتجات زراعية جنب التصنيع .. احنا غلطنا غلطة جسيمة في المرحلة الماضية لما أهملنا الزراعة وركزنا علي الصناعة . ووصلنا الي الحد اليوم اللي بنشكوفيه اننا مع كل هذه الامكانيات اللي اعطاها لنا الله سبحانه وتعالى في وطننا هنا بنستورد بمئات الملايين علشان ناكل في الوقت الذي كان مفروض نصدر

فعلا فيه بمئات الملايين بعد احنا مانكتفي .. دولة زي أمريكا كلكم تعلموا كيف وصلت الزراعة فيها

وكيف وصلوا الي المرحلة اللي الحكومة بترجوا الفلاحين انه يقللوا المساحات المزروعة من المحاصيل لان الفائض بعد ما بتاكل أمريكا كلها .. وبتبيع للعالم كله كمان فائض ماهمش قادرين يخزنوه ، وعلي ذلك بتعوض الفلاحين علشان يزرعوا نص المساحات اللي بيزرعوها .. اليوم لازم نصحح هذا الخطأ اللي وقعنا فيه ، ولكن انا جمعتمكم الحقيقة علشان أولا استمع لكم ، واحنا جميعا نستمتع لمشاكلنا ، ونفكر كيف تكون نقطة الابتداء .. انا باقول في اعادة بناء مصر اللي احنا بصدددها النهاردة ، وزى ماقلت لكم ارادتنا في ايدنا ، وأرضنا ملكنا محدش شريكنا فيها ، قرارنا في ايدنا .. وانا باقول انه لا بد أن يتجه الجهد الاعظم في الدولة كله الي الزراعة ، الي المجتمعات الجديدة ، الأرض الجديدة ، الانتاج تماما زي ما تحدث أحد الاخوة اللي تحدثوا يمكن نقيب الزراعيين انه المهندسين الزراعيين بيتكدسوا في الوقت اللي الارض في مصر موجودة ، وصالحة ، وكل المطلوب هو انه تنتقل لها المية وتوصلنا علشان تقوم نهضة زراعية يكون من شأنها انه أول مبدأ من مبادئ صيانة الانسان المصري وكيانه وحياته علي الغذاء الكامل بالسعر المناسب زي مايجري في أمريكا .. من هنا وبعد ما سمعنا ماسمعناه اعتقد انه جميع الاجهزة في الدولة النهاردة ، وهي بتستمتع لهذا لان الشعب كله بيستمع لهذا معنا اجهزة الدولة كلها لا بد أن تبدأ في وضع الاولويات العلمية لاعادة البناء بلا شك انتاج الطعام وحصول المواطن المصري والمواطنة والطفل المصري اللي هو عماد المستقبل ، والاجيال المقبلة لازم يحصل علي غذائه من مصر ، وبالسعر المناسب ده لن يكون الا بزيادة الانتاج ، كما تحدث نقيب الزراعيين الارض واحنا ١١ مليون ففي أول هذا القرن كانت ٥ مليون لما بقينا ٤١ مليون وبقيت ٦ مليون اللي في الوقت اللي زي ما باقول لكم .. بنفسى زرت كل انحاء مصر بحثا عن امكانيات الامل والمستقبل

لشعبنا وشبابنا ووجدت انه لكل انسان مكان علي ارض مصر لرخائه ، لكل انسان فرصة ، كل ماينقص هوالعرق ، والجهد وانه نضع خطة

نستفيد من كل تجارب الاخرين اللي سبقونا مانبتديش من الوقت اللي ابتدوا بيه همه لانه لدينا .. أمامنا التجربة والخبرة العالمية .. طيب لماذا لا نستفيد بيها ؟ بيتكلم الأخ بتاع التعاونيات الاخير من المحطة اللي افتحتها النهاردة أنا في كمشيش هنا جنب ميت أبوالكوم هذه المحطة مفروض انها تتضاعف .. دي بتطلع ١٥ مليون بيضه وقبلها زي ما قال في انشاص ٦٠ مليون بيضة .. كل ده طالع محدش حس بيه ، احنا من ٣-٤ سنين باشتغل في هذه العملية ، محدش حس ليه لان عندنا مليون كل عشرة أشهر جداد .. اذن عملنا لازم يتضاعف عشرات المرات علشان يحس المواطن .. والمواطنة المصرية بالرخاء ويكفي انتاجنا الغذائي لكل مواطن .. بحمد الله احنا بنبدأ ده واحنا في هذا المكان من العالم ، ومن حولنا الامة العربية ومنطقة الشرق الاوسط كلها دول قايمة علي الحكم البوليسي ، والمعتقات ، والتصفيات ، والسجون .. بحمد الله علي أرضنا هنا جزيرة فيها السلام .. فيها الحب فيها العيلة الواحدة المتامسكة

ينقصنا شئ واحد بس انه ننظم جهودنا اللي النهاردة انا جاييكم علشانها ، وبعد ما سمعنا وكان لازم نسمع هذا علشان كلنا نشترك .. ازاي توجد نقطة البدء السلمية .. علينا ان احنا بعدما استمعنا نقعد ولا نضيع الوقت أبدا علشان توجد نقطة البدء السلمية لاعادة البناء

تحدث بعض الاخوة اللي تحدثوا عن وضع اليد الارض بحجة الزراعة ولكن بتتحول لعمليات المضاربة أوالاتجار وسمعت عن هذا .. ده كله كلام فارغ ، انا بأعلن امامكم ، ،باقول ، انه كل من يستطيع أن يزرع وينتج أرض حملكها له بس بشرط أنه يزرعها ،مش يحط عليها يافطة ان دي بقت ملك فلان اوزي ما سمعت شركات سواء ان كانت وهمية اوغير وهمية وقاعدة علشان الاتجار . لا .. كل ده لا قيمة له

وتسمعوا وسمعتم من محافظ القاهرة في التعديت علي املاك الدولة ، وما فيش  
النهاردة مجاملة لاي انسان ابدأ .. انما أنا بانادي ن الارض تنزرع لانه زي ما  
قلت لكم سيظل اقتصادنا عماده هي الزراعة ولازم نفهم هذا ونعود الي هذا .. لايد  
أن نزرع الارض ولايد ان تطور المدن الجديدة ،، بتحل مشكلة الاسكان من ناحية ،  
ومشكلة الانتاج والطعام من ناحية اخري .. واتفقت مع رئيس الوزراء انه كل  
المشاريع الجديدة تخرج الي الارض الجديدة .. ممنوع البناء اطلاقا علي الارض  
القديمة في الوادي القديم بتاعنا وفي هذا أنا باطلب من النائب أنه يحدد هذا الكلام مع  
سلطات الدولة المختلفة كلها لعدم التعدي علي كمية الارض اللي ما زادتش مليون  
فدان في فترة ٧٠ أو ٨٠ سنة داخلين أهه .. بالعكس ده احنا عايزين نضيف ارض  
جديدة الي هذا .. كل المشروعات الجديدة لايد أن تقام علي الارض الجديدة لازم ..  
اللي أنا مجتمع بيكم علشانه واجتمعت باخوانكم وزملائكم واخواتكم قبل كده وحاكمل  
باذن الله وحتبقي اجتماعات ماشية مستمرة اللي بيهمني كيف نجد نقطة الابتداء أنا  
عن نفسي مثلا باحلم احنا قاعدين في الوادي الضيق اللي احنا عايشين فيه من اول  
القرن الحالي ، ومن قبل القرن الحالي .. الوادي الضيق اللي جنب النيل اللي وصلنا  
فيه من ٣ - ١١ الي ٤١ مليون . ، حننفجر علي نفسنا .. طيب انا باحلم بالخطة  
اللي توضع ويطلع رواد اولاد ورواد بنات من اولادي البنات ايضاً رواد ويطلعوا  
علي الأرض الجديدة ويبدأوا بالعرق والعمل زي ما حصل في أمريكا في الزحف  
علي الغرب علشان يعملوا هذا لايد أديهم الميه لايد اوصل لهم الميه .. ده اللي انا  
باعمل عليه الآن ان الميه والطريق .. الطاقة ماعدتتش مشكلة اليوم في ميت أبوالكوم  
قبل ماجي لكم هنا هو بالشمس وبجهاز عملوه ابنا عا بتوع البحوث الدكاترة شبان  
وشابات علي كل بيت خزان وجهاز صغير لا يكلف كثيرا بيدي طاقة للميه السخنة  
ثم بدأوا بالجهاز اللي بيدي طاقة كهربائية وجامع ميت أبوالكوم بمكرفونات الخمسة  
اللي اتركبوا فيه صوته شئ من اروع ما يمكن بطاقة شمسية من الشمس

في ايدينا اذن الرفاهية وعندنا الأرض ، عندنا المية بارميها في البحر الابيض سمعتموني بارمي ٦ مليار متر مكعب ميه كل سنة علشان التوربينات تشتغل في أسوان ، وتدينا الكهربا طيب السنه مليار ما نخدم من النيل بدل ما يروحوا البحر الابيض ونحولهم علي الارض الجديدة ، لكن محتاجة لرواد .. رواد زي اللي طلخوا وبنوبلاد زي امريكا بيشتغلوا سنة ، واثنين ، وثلاثة ، وبعدين ببيان نتيجة عملهم رخاء . ومستوي من المعيشة من أحسن ما يمكن ان يتصوره انسان .. لما قال نقيب الزراعيين عن استهلاك المية وأن الفدان عندنا بنرويه بثمان الاف متر مكعب وبتوصل لعشرة وحداشر .. في اسرائيل جنبنا هنا هم بيرووا بألفين متر مكعب فقط مش ثمانية ولا عشرة ولا حداشر وبيطلعوا انتاج احسن من الانتاج اللي احنا بنطلعه لانه طبعا زي ما انتوا عارفين الغمر بيخسر الارض ، وعايز صرف باستمرار ، ده مش محتاج لده كله وانما التكنولوجيا الحديثة.. الشئ العظيم اللي باتفق انا مع نقيب الزراعيين فيه ان احنا عندنا الاولاد اللي لا يقلوا لا خبرة ولا كفاءة عن اللي بيعملوا في اسرائيل ابدأ بس لدينا ما هو احسن عشرات المرات ، لكن مطلوب بدء العمل مطلوب نقطة الابتداء وروح الريادة ، وده اللي انا باكلمكم علشانه .. وعلشان نقعد كلنا نشغل نفسنا بيه .. توصيل الميه والطريق علي الدولة .. عدا ذلك لا بد يحصل عندنا خروج من الوادي الضيق الي الأرض الفسيحة الرائعة .. علي بحيرة السد العالي من أسوان الي حدودنا مع السودان ٣٥٠ كيلومتر طولي بنفسي مشيت علي الارض اللي في الغرب .. في غرب البحيرة ، واللي في الغرب واللي امل من آمالنا الكبيرة ارض لم تزرع منذ الخليقة ومن أجود أنواع الاراضي في العالم والمية موجود عليها في البحيرة .. في سيناء نفس الشئ شفته .. أجود أرض، في الصالحية .. في الوادي الجديد عشرات الآلاف من الافدنة الارض الحمرا اللي ماهيش عندنا في مصر ، واللي ما بنشفهاش ابدأ عندنا في مصر موجودة .. المجال موجود ، وكل شئ موجود ، مطلوب طاقة الانسان وعرق الانسان ، خصوصا وانه خيل لبعض

العرب من حولنا بعد ما طفت خزائهم بالذهب ودولارات البترول من دماء أولادكم  
واخواتكم اللي عبروا من هنا .. ماهي دي كانت أرض معركة

الأرض اللي انتوقاعدين عليها دي وشايفنها خضراء كانت مغطاة بالبارود الأسود  
لان دي كانت أرض المعركة .. بعد ما طفت خزائهم من دماء أولادنا لأنه  
ماقدروش يرفعوا سعر البترول الا بعد معركة أكتوبر وأمموا أيضا شركات البترول  
وخدوها بالكامل .. اتهاى لهم انه الفلوس تشتري الاخلاق أو المبادئ وطاف في ذهن  
البعض للاسف وبكل مرارة انهم يستطيعوا انهم يجوعوا مصر علشان يضموها  
لسياسة الصغار .. احنا علينا تحدي النهارده والحمد لله اعطانا الله سبحانه وتعالى  
ما هو أحسن وأروع من البترول مليون مرة .. الأرض والنيل ، والماء  
والجو والمواطن والأرض الطيبة اللي كلها قيم وايمان وسماحة .. اعطانا الله ده كله  
أروع من كل شئ علينا ان احنا نوريهم جميعا ان هنا البناء ، والرخاء ، والغني زي  
ماهي جزيرة الامن والأمان والديمقراطية والاخلاق لازم تكون هذه الأرض ان شاء  
الله أرض الرخاء تصفيق

نحمد الله انه مش حيكون مؤقت زي البترول بيجي يوم عليه يخلص لأده الأرض  
هنا كل ما تخدمها كل ما تعطي أكثر وأكثر الي الابد .. علينا أن نواجه هذا التحدي  
علينا أن نبني البناء اللي يحقق لكل مواطن ومواطنة حياة كريمة وايضا يحقق لمصر  
مكانها دائما كما كانت من سبع الاف سنة عالية الرأس بلد الحضارة .. بلد القيم .. بلد  
المبادئ .. علينا أن نفكر جميعا في نقطة الابتداء .. الدولة بتعمل في هذا وأن شاء  
الله رئيس الوزراء انا طالب منه بأسرع ما يمكن أن تتم الدراسات علشان أقف في  
اليوم اللي أشوف فيه أولادي طالعين فيه قوافل ووجه مصر بيخضر كله بالخير  
وبالحب وبالنماء وبالاصالة وبقوة مصر اللي بدونها لن يقدروا يعملوا سلام ولن  
يقدروا يعملوا حرب واللي بدونها لن يستطيعوا أبدا أن يكونوا شئ في هذا العالم ..  
لان في هذه المرة ، وفي هذه المرحلة نضع كل شئ في مكانه ويعرف كل انسان

حجمه .. أنا سعيد جدا بكل كلمة استمعت لها النهاردة ، وبالنسبة للامن الغذائي فعلا لابد انه نعمل مجلس اعلي للامن الغذائي علشان التخطيط لانتاج الغذاء هنا ونعود كما كنا تماما مصدر كل خير ، وكل شئ .. بقيه الامور اللي استمعنا اليها ، كل هذه الاجتماعات بتسجل وفورا بعد العيد مباشرة بيصدر كتاب فيه كل مادار من مناقشات ومن آراء علشان نستهدي بها في المرحلة المقبلة باذن الله .. كل اللي عايز اقوله لكم انه احمد الله سبحانه وتعالى انه خلقنى مصري ، من هذا التراب الطاهر انا باحمد الله وفخور بيكم جميعا .. فخور بكل انسان رجل أو امرأة علي أرض شعبنا هنا في مصر أولادنا، واخواننا ، وأولادكم واخواتكم عملوا معركة التاريخ من هذا المكان واثبتوا من هي مصر عليكم انتوا ان تعملوا المعركة لكي يرتفع البناء هذه المرة بايدينا جميعا . باشتراكنا جميعا .. بفخرنا جميعا لترتفع علي مصر دائما اعلام الحب ، والقوة ، والعزة ، والرخاء ، السعادة لكل مواطن ، ولكل اجيالنا المقبلة ان شاء الله . ربنا يوفقكم .

والسلام عليكم ورحمة الله